

خَطِ پوُلُسِ بَلَدِه فِلِيمُون

پیشگفتار

فِلِيمُون یگ ایماندار بُوَد و اِمکان دَرِه که یکی از اعضای جماعتِ ایماندارای شارِ کولسیه بُوَدِه بَشِه. اُو یگ غلام دَ نامِ اونیسیموس دشت که از پیش شی دوتا کدَد و یگو چیز شی ره ام شاید قد خو بُرُدَد. مُطابِقِ قانونِ رُومِ جَزایِ اَزُو کَلو سخت بُوَد. دَ امزُو زمانِ پوُلُسِ دَ بَنَدی خانِه بُوَد و اونیسیموس قد اَزُو آشنا شُد و دَ وسیلِه اَزُو دَ عیسیٰ مسیحِ ایمان اُورَد.

دَ امزی خطِ، پوُلُسِ از فِلِيمُون خاهش مونه که اُو اونیسیموس ره دَ عنوانِ برارِ عزیز خُو قبول کنه و قد ازی کارِ دِل-و-جانِ پوُلُسِ ره تازه کنه.

فهرستِ عنوانِ ها

دُعا و سلام (آیه ۱)

شُکرگزاری و دُعا (آیه ۴)

خاهشِ پوُلُسِ از فِلِيمُون (آیه ۱۰)

دُعا و سلام

^۱ از طرفِ پولُس، که بخاطرِ مسیحِ عیسیٰ بَدیِ اَسْتَم و از طرفِ برارِ مو تيموتائوس بَلدِه دوستِ عزیز و همکارِ مو فِليمون ^۲ و بَلدِه خوارِ مو اَپفیه و بَلدِه همسنگرِ مو اَرخِیُس و بَلدِه جماعتِ ایماندارای که دَ خانِه تُو جَم موشه: ^۳ فَيِض و سلامتی از جانبِ آتِه مو خُدا و مولا عیسیٰ مسیحِ نَصیبِ شُمو شُنه.

شُکرگزاری و دُعا

^۴ وختیکه تُو ره دَ دُعا های خُو یاد مُونم، همیشه خُدايِ خُو ره شُکر-و-سپاس مُوگيم، ^۵ چراکه دَ باره ایمان تُو دَ مولا عیسیٰ و مُحَبَّتِ تُو بَلدِه تمامِ مُقَدَّسِين مِيشِنُوم. ^۶ دُعا مُونم که شَرِیکِ کدونِ ایمان تُو قدِ دیگر و تاثیرگزار شُنه، تا تمامِ خُوبی های ره پي بُری که دَ وسيلِه مسیحِ دَز مو و جُودِ دَره. ^۷ آی برار، مُحَبَّتِ تُو خوشی و دِلگرمی کلو نَصیبِ مه کده، چراکه دِل های مُقَدَّسِين دَ وسيلِه از تُو تازه شُدِه.

خاهشِ پولُس از فِليمون

^۸ پس، اگرچه دَ وسيلِه مسیحِ جُرأتِ کده مِيتَنم که دَ بِلِه تُو حُکمِ کُنم تا وظيفه خُو ره انجام بَدی، ^۹ لیکن دَ اساسِ مُحَبَّتِ از تُو خاهشِ مُونم. ما، پولُس که یگِ آدمِ پیر و فِعلاً بخاطرِ

مسیح عیسیٰ بندی آستم، ^{۱۰} د باره باچه خو اونیسیموس که د دورون بندی گری ما آته روحانی ازو شدم، از تو یگ خواهش مونم. ^{۱۱} او سابق بلده تو بے فایده بود، ولے فعلاً ام بلده از تو و ام بلده از مه فایده مند آسته. ^{۱۲} او ره که دل-و-جان مه آسته، د پیش از تو پس ریی مونم. ^{۱۳} ما میخاستم که او ره د پیش خو نگاه کنم تا د دورونی که ما بخاطر خوشخبری بندی آستم، د جای از تو بلده مه خدمت کنه، ^{۱۴} لیکن نخاستم که بدون موافقت از تو کدم کاری کنم تا نیکی-و-مهربانی تو از روی مجبوری نبشه، بلکه از روی رضایت بشه. ^{۱۵} شاید د امزی دلیل او بلده یگ وخت کم از تو جدا شد تا که تو او ره بلده همیشه قد خو دشته بشی، ^{۱۶} مگم نه مثل یگ غلام، بلکه باله تر از یگ غلام، مثل برار عزیز. خصوصاً بلده از مه او عزیز آسته، ولے بلده از تو گلوتر، ام از نگاه انسانی و ام د خدمت مولا. ^{۱۷} پس اگه مره همکار خو میدنی، امو رقم که از مه پذیرایی مونی ازو ام پذیرایی کو. ^{۱۸} اگه کدم غلطی قد تو کده بشه و یا کدم چیز از تو قرضدار بشه، د پای از مه حساب کو. ^{۱۹} ما، پولس، قد دست خود خو امی ره نوشته مونم: ”ما او ره آدا مونم.“ البته نموگم ام که تو حتی جان خو ره از مه قرضدار آستی. ^{۲۰} ارے، آی برار، امیدوار آستم که امی فایده تو د نام مولا دز مه برسه. پس دل-و-جان مره د نام مسیح تازه کو. ^{۲۱} ما بخاطر اعتمادی که د اطاعت تو درم، ای ره نوشته مونم و میدنم که حتی گلوتر از چیزی که تقاضا مونم، انجام میدی. ^{۲۲} علاوه ازی، یگ اُتاق بلده مه آماده کو، چون امیدوار آستم که د وسیله دعا های شمو دوباره د پیش شمو آورده شنم. ^{۲۳} ایپفراس که بخاطر عیسیٰ مسیح قد از مه قتی بندی آسته سلام ریی مونه، ^{۲۴} امچنان همکارای مه

مَرْقَس، اَرِسْتَرخُس، ديماس و لوقا. ^{٢٥} فيضِ مولا عيسى مسيح قد روح شمو بشه.

سوال داريد؟ +1 807.700.6090

afghanbibles.org © آزرگي

Copyrighted material not for reprint/publishing purposes.